

**TEZAUUR LITURGIC**  
**19 DECEMBRIE**

**ACATISTUL**  
**SF. CUVIOS**  
**ILIE MUROMET**  
**DE LA**  
**PECERSKA**  
**III**



**MOSCOVA, 2000**



# **АКАФИСТ**

## **преподобному Илие**

### **Муромцу**

#### **Кондак 1**

Избранный воеводо ратоборцев за веру Христову и преславный угодниче Божий, крепкий победителю врагов державы Российския и чудотворче предивный, преподобне отче Илие, прославляюще Господа Славы, давшего тя всем православным заступника и молитвенника, похвальная восписуем ти пение. Ты же, предстоя Престолу Святыя Троицы, от всяких зол и напастей сохраняй с верою и любовью зовущих ти:

Радуйся, преподобне отче Илие, святой воине и великий заступниче Российския земли.

#### **Икос 1**

Ангелов и человеков Творец призва тя, угодниче Божий Илие, да будеши всем людем Российским образ мужества и верности во бранех лютых со враги Отечества нашего. Мы же, прославляюще чудный подвиг земных трудов твоих, благоговейно зовем ти:

Радуйся, от рождения твоего Богом

избранный.

Радуйся, в безвестности начало жизни своея сохранивший.

Радуйся, при крещении имя великаго пророка Божия Илии получивый.

Радуйся, благодатию Христовою от недуга тяжкаго исцеленный.

Радуйся, на воинское служение Господем призванный.

Радуйся, избрание твое подвиги многими оправдавый.

Радуйся, пророку Илии в ревности по Бозе и спасении людей подражавый.

Радуйся, любовь нелицемерную от народа своего снискавый.

Радуйся, обеты иночества житие свое увенчавый.

Радуйся, в сонме преподобных отцев Киево-Печерских прославленный.

Радуйся, душу свою за друга полагавый.

Радуйся, к воинству Небесному сопричтенный.

Радуйся, преподобне отче Илие, святой воине и великий заступниче Российския земли.

## **Кондак 2**

Видевше родители тебе, преподобне,  
тридесять лет в расслаблении суца,

недоумеваху, обаче с верою и надеждою моляху  
Единого и Истинного Бога, подающего  
страждущим исцеление, и вкупе с тобою  
воспеваху ему: Аллилуиа.

## **Икос 2**

Разум небесный свыше даровася тебе, егда  
глас посланников Божиих услышал еси и по  
слову их, востав со одра твоего, аки николиже  
болевым, в радости неизглаголанней благодарил  
еси безмездного Врача твоего, Христа. Мы же,  
дивящиеся таковому о тебе Божию  
промышлению, со умилением вопием ти:

Радуйся, благочестивых родителей твоих чадо  
возлюбленное.

Радуйся, надеждо и утешение сердец их  
боголюбивых.

Радуйся, радости родителей твоих  
исполнение.

Радуйся, благоверия предков твоих  
наследниче.

Радуйся, от рождения благодатию Божиею  
покровенный.

Радуйся, от юности Господа возлюбивый.

Радуйся, града Мурома духовное украшение.

Радуйся, Российския страны благодатное  
озарение.

Радуйся, крепости Божией тезоимените.

Радуйся, яко по имени твоему и житие твое блаженно бысть.

Радуйся, яко о тебе радуются ангели на небеси.

Радуйся, яко о тебе Бога славят человецы на земли.

Радуйся, преподобне отче Илие, святой воине и великий заступниче Российския земли.

### **Кондак 3**

Силою свыше укрепився, услышал еси, блаженне, глас мужей, Богом посланных: «Будеши ты, Илие, богатырь великий, и смерть тебе во бранех не писана есть». Ты же, восприяв силу богатырскую, направил еси стопы своя на работу крестьянскую, яко Бог укрепляше тя, поспешествуя в трудах твоих. Темже молися Богу, подающему нам времена плодоносна, и укрепи всех труждающихся на земли и поющих Ему: Аллилуиа.

### **Икос 3**

Имея помышление в сердце своем, послужити Христу, даровавшему тебе исцеление и силу великую, изшел еси из дому родителей твоих и меч в руке восприим, направился еси на брань противу сил вражиих за веру православную и за землю Русскую. Темже и мы, ублажающе благое твое изволение, с любовью

восхваляем тя сице:

Радуйся, яко смотрением Божиим тридесять лет в болезни неисцельней пребывал еси.

Радуйся, достойный от Господа благодатнаго посещения.

Радуйся, чудесное исцеление милостию Божиею получивый.

Радуйся, исцелением от болезни родителей твоих возвеселивый.

Радуйся, от странников Божиих весть о служении твоём приемый.

Радуйся, пророческое их проречение исполнивый.

Радуйся, здравие приемый, да послужиши Исцелившему тя.

Радуйся, утвердивый мышцы своя на труды и работу крестьянскую.

Радуйся, на службу Господу яко воин призванный.

Радуйся, дом родительский служения ради Богу и Отчизне своей оставивый.

Радуйся, совершенную покорность воле Божией показавый.

Радуйся, дивный образ богатыря святорусскаго в себе явивый.

Радуйся, преподобне отче Илие, святой воине и великий заступниче Российския земли.

### **Кондак 4**

Бурю злых напастей побеждая, прошел еси весь путь, тебе преднареченный, нося тяготы воинского служения, и тако благодатию Божиею хранитель Отечества своего и непобедимый воевода нашему воинству явился еси, ратоборствовал бо еси, не земному князю угождая, но желанием и ревностью по Богу полки иноплеменных побеждая. Темже благодарственно воспевал еси песнь хвалебную Господу: Аллилуиа.

### **Икос 4**

Видевше разбойницы, с мечем ожидавшии тя на пути к матери градов русских, Киеву, небоязненное твое мужество и крепость воинскую, убояшася, ты же презрел еси их дерзости и победил еси зломысливших на тя. Темже молим ти ся: разбойники пощадивый и к покаянию тех обративый, направи и наша души к покаянию и спаси молитвами твоими поющих тако:

Радуйся, на подвиги воинския и духовныя от родителей твоих благословенный.

Радуйся, благословение сие яко святыню до смерти соблюдый.

Радуйся, разбойников прещение ни во что же вменивый.

Радуйся, милосердием врагов, тобою  
побежденных, удививый.

Радуйся, вшедый в стольный град Киев яко  
богатырь святорусский.

Радуйся, от князей земли Русския достойно  
почтенный.

Радуйся, Российския державы защитниче.

Радуйся, правителем ея благоверным  
помощниче крепкий.

Радуйся, на подвиг брани воинския и  
духовныя вдохновителю.

Радуйся, обидящих и жестокосердых грозный  
вразумителю.

Радуйся, Небеснаго ради Отечества земному  
отечеству послуживый.

Радуйся, Богом возлюбленный и российскими  
людьми воспеваемый.

Радуйся, преподобне отче Илие, святой  
воине и великий заступниче Российския земли.

### **Кондак 5**

Боготечною звездою востекл еси, славный  
Илие, ко святому граду Киеву, ревностию  
воспламеняемь о защите земли Русския,  
сопротивных побеждая и вражеския полки  
прогоняя. И ныне наставляеши на путь  
служения отчизне, к вечному Небесному  
Отечеству ведущий всех верных, поющих Богу:

Аллилуиа.

### Икос 5

Видевше тя, блаженне Илие, николиже во бранех побеждаема, невернии единого имени твоего устрашася. Ты же, яко доблий воине Христов, на страже пребывал еси непоколебим и мечем посекал еси нечестивых в битвах. Сего ради, поминающе исполненное веры мужество твое, прославляем тя сие:

Радуйся, воине Христов, еще в земнем житии от Него славою венчанный.

Радуйся, и во славе своей дух смиренномудрия соблюдый.

Радуйся, мечем богатырским вооруженный.

Радуйся, множество врагов в битвах победивый.

Радуйся, силою Креста во бранех укрепленный.

Радуйся, рукою Всевышняго во всех битвах дивно охраняемый.

Радуйся, врагов России грозное устрашение.

Радуйся, воинства христианскаго прославление.

Радуйся, злобу и коварство врагов отчизны твоея посрамивый.

Радуйся, Российския земли защитниче верный.

Радуйся, любящая Отечество войны на победу умудряй.

Радуйся, яко заступлением твоим и ныне держава Российская ограждается.

Радуйся, преподобне отче Илие, святой войне и великий заступниче Российския земли.

### **Кондак 6**

Проповедует вся великая Россия о тебе, Илие славне, ты бо яко крепкий щит ограждаеши Отечество наше непобедимым оружием, Божественною благодатию дарованным ти свыше. Не лиши и нас, грешных, твоя помощи, тебе бо сами себе и друг друга вверяем и во умилении сердец воспеваем прославльшему тя Христу Богу: Аллилуиа.

### **Икос 6**

Возсия слава подвигов твоих не токмо в преславнем граде Киеве, но и по всем градом и весем страны нашея. Темже людие Российстии доныне славу и благодарение Богу приносят и тебе, заступника своего, похвалами воспевают тако:

Радуйся, воинства Российскаго крепосте несокрушимая.

Радуйся, победителю враг видимых и невидимых.

Радуйся, благочестивых воинов в битвах

укрепляяй.

Радуйся, покровом молитв твоих в день брани тех осеняяй.

Радуйся, от нашествия иноплеменных наше ограждение.

Радуйся, от междоусобных брани охранение.

Радуйся, яко великому мужеству твоему всяк возраст покланяется.

Радуйся, яко и в землях Запада прославлено бысть имя твое.

Радуйся, людей Российских любовью Христовою возлюбивый.

Радуйся, веру свою и любовь к Богу делы явивый.

Радуйся, образ верности в служении Богу и Отечеству показавый.

Радуйся, святою ревностию о спасении державы Русския пламеневый.

Радуйся, преподобне отче Илие, святой воине и великий заступниче Российския земли.

### **Кондак 7**

Хотя Человеколюбец Господь явити в житии твоем, богомудре Илие, образ не токмо воином христолюбивым, но и ликом иноческим, внуши тебе оставите славу земную и восприяти пострижение во обители Киево-Печерстей, в нейже подвизался еси добре постом, бдением и

молитвою, воспевая непрестанно Богу ангельскую песнь: Аллилуиа.

### **Икос 7**

Новую благодать во иночестем образе прием, преподобне Илие, новым подвигом украсил еси житие твое, подражая во всех добродетелех преподобным отцем Антонию и Феодосию и прочим чудотворцем Печерским. Темже славим тя по достоянию и глаголем:

Радуйся, во ограду обители Киево-Печерския пришедый.

Радуйся, постом, бдением и молитвами Христу Богу добре угодивый.

Радуйся, в ангельский образ достойно облеченный.

Радуйся, паки и во иноцех Илия нареченный.

Радуйся, доспехи воинския на власяницу иноческую пременивый.

Радуйся, плоть свою духу покоривый.

Радуйся, яко в житии твоем Антонию дивному подражал еси.

Радуйся, яко в подвизах твоих Феодосию чудному ревновал еси.

Радуйся, подвигов иноческих ревнителю.

Радуйся, чистоты и воздержания хранителю.

Радуйся, в ризу смирения одеянный.

Радуйся, иноческия обеты до смерти

соблюдый.

Радуйся, преподобне отче Илие, святыи воине и великий заступниче Российския земли.

### **Кондак 8**

Странника и пришельца в мире сем помышляя еси себе быти, преподобне отче Илие, темже о благих земных всякое попечение отложил еси и грядущаго града Иерусалима Небеснаго взыскупа, приносил еси Господеви житие преподобное, яко быти тебе во плоти ангелу и небесному человеку и невозбранно пети ангельскую песнь Богу: Аллилуиа.

### **Икос 8**

Весь оделся еси во вся оружия Божия, яко воин Христов, препоясав чресла твоя истиною, оболкся броней правды, восприял еси щит веры и шлем спасения и меч духовный, имиже и возмогл еси вся наветы лукаваго победити. Помози убо твоими молитвами всем нам противитися искушением вражиим и подражати тебе в подвизех, воспевающе ти хвалы сия:

Радуйся, во обители Киево-Печерстей пристанище спасения стяжавый.

Радуйся, под кровом Киевских чудотворцев подвиг иноческий совершивый.

Радуйся, преподобных Печерских духовный

учениче.

Радуйся, добродетелей их преемниче.

Радуйся, иноков Киево-Печерския Лавры украшение.

Радуйся, подвизающихся в ней благонадежное заступление.

Радуйся, приходящих в ню на поклонение благий предстателю.

Радуйся, обители твоея неотступный хранителю.

Радуйся, града Киева светлое радование.

Радуйся, Российских иноков славо.

Радуйся, горняго мира жителю.

Радуйся, дольняго мира мудрый странниче.

Радуйся, преподобне отче Илие, святыи воине и великий заступниче Российския земли.

### **Кондак 9**

Все естество ангельское удивися преславней кончине твоей, отче преподобне, еюже житие твое достойно венчал еси. Такожде и Церковь Русская Православная, купно со всеми чудотворцы Печерскими в молитвенники тя приемши, благодарне о тебе вопиет Богу: Аллилуиа.

### **Икос 9**

Ветии многовещаннии недоумеют достойно восхвалити и прославити подвиги твоя,

преподобне Илие, яже творил еси на земли, но и по преставлении твоём в вечное царство славы не оставляеши нас, грешных, и в пещерах Киевских нетленными твоими мощами пребываеши, в шуйце имый оружия язву, десницу же троеперстно сложенную. Темже, яко живу сущу с нами, от всего сердца глас хвалы приносим ти:

Радуйся, праведно и богоугодно течение земное совершивый.

Радуйся, дух твой с веселием в руке Господни предавый.

Радуйся, пред кончиною своею персты десницы троеперстно во имя Святыя Троицы сложивый.

Радуйся, к Трисолнечному Свету восшедый.

Радуйся, телом смертным во обители Печерстей погребенный.

Радуйся, душою же бессмертною к Сиону горнему воспаривый.

Радуйся, от обители земныя во обителях Небесных водворивыйся.

Радуйся, честныя и многоцелебныя мощи твоя святыя нам оставивый.

Радуйся, в сонме преподобных Печерских звездо сияющая.

Радуйся, Лавры Печерския славо и радование.

Радуйся, всех преподобных Российских сподвижнице.

Радуйся, к Богородице молитвеннице наш неусыпный.

Радуйся, преподобне отче Илие, святой воине и великий заступнице Российския земли.

### **Кондак 10**

Спасти хотя землю Русскую от нашествий вражиих, Моисею и Давиду и прочим вождем людей Божиих подражая, мужественно во бранех подвизался еси, отче преподобне. Темже и на Небеси с ними, яко победитель, торжествуеши, моляся о воинствующих за правду и благодарственно вопиющих Богу: Аллилуиа.

### **Икос 10**

Стена еси и ограждение от врагов видимых и невидимых земли Русския, в нейже, отче Илие, жительствовал еси, и ныне пребываеши нетленным телесем твоим. Сего ради и мы, грешнии, во дни смуты и нестроений в стране нашей припадаем к тебе, отче святой, и слезно взываем: охраняй и ныне Отечество наше от нашествий иноплеменных, от раздоров и междоусобных брани, да не погибнет Русь Православная и Богом любимая и да не престанет величати тя сице:

Радуйся, дивную любовь ко Отечеству  
земному показавый.

Радуйся, по всей Российской земли Богом  
прославленный.

Радуйся, Росийския страны ограждение.

Радуйся, Православия в ней утверждение.

Радуйся, враждующих на землю нашу  
укротителю.

Радуйся, о мире державы Росийския пред  
Господем предстателю.

Радуйся, за Дом Пресвятыя Богородицы,  
страну Росийскую, даже до смерти стояти  
научаяй.

Радуйся, в подвизех и страданиях за правду  
верных укрепляяй.

Радуйся, нетлением мощей твоих славно от  
Бога возвеличенный.

Радуйся, всем с верою приходящим к ним  
исцеления подаваяй.

Радуйся, о всех градах и весех Росийских  
молитвенниче.

Радуйся, яко молитвами твоими людие  
расточеннии любовию собираются.

Радуйся, преподобне отче Илие, святой  
воине и великий заступниче Росийския земли.

## Кондак 11

Пение молебное, с любовью приносимое  
днесь в память твою милостивно услыши,  
преподобне Илие, и буди во вся дни благий наш  
предстатель и присный за ны ко Господу  
молитвенник, да о тебе радуящися, вси сынове  
Русстии едиными усты и едином сердцем  
прославят Бога, поюще Ему: Аллилуиа.

## Икос 11

Светлое празднество твое, препodobне Илие,  
яко торжество веры и правды совершает святая  
Церковь Христова, созываючи на духовную  
трапезу верная чада своя. Приими убо гласы  
хваления тебе, небесному заступнику нашему, с  
любовию от нас возносимья:

Радуйся, Церкви Российския светильниче.

Радуйся, ангеле земный и человеце небесный.

Радуйся, яко с горящим светильником вшел  
еси в радость Христа.

Радуйся, яко и нас благодатным светом  
просвещаеши.

Радуйся, светом жития твоего страну нашу  
озаривый.

Радуйся, яко, видяще подвиги твоя, человецы  
Отца Небеснаго прославляют.

Радуйся, храмы Божия, во имя твое  
освященныя, благоволением твоим осенивый.

Радуйся, яко молитвою пред иконою твоею душевное утешение приемлем.

Радуйся, блаженства святых удостоенный.

Радуйся, сострадания к людем преисполненный.

Радуйся, яко с преподобными и праведными веселишися.

Радуйся, яко со всеми святыми присно торжествуеши.

Радуйся, преподобне отче Илие, святой воине и великий заступниче Российския земли.

### **Кондак 12**

Благодать мира и единения народом словенским, благоденствие державе Российстей и земли нашей тишину испроси у Бога, преподобне, яко да и мы, от всех расколов и разделений свободдшесея, в мире воспоим прославльшему тя Единому Миротворцу всех Господу: Аллилуиа.

### **Икос 12**

Поюще равноангельное житие твое, преподобне, хвалим, славим и величаем укрепившаго тя Господа, даровавшаго нам в тебе богатыря духовнаго святорусския земли яко образ достоподражательный до скончания века. Приими убо, угодниче Христов, от нас, смиренных, с любовию тя почитающих, похвалы

сия:

Радуйся, народом словенским заступниче.  
Радуйся, Отечеству нашему печальниче  
нелицемерный.

Радуйся, яко твоим предстательством от  
распрей и междоусобий свободждаемся.

Радуйся, яко в почитании твоём во едино  
братство соединяемся.

Радуйся, могущества и славы державы  
Российския утвердителю.

Радуйся, воинскаго и богатырскаго духа в  
ней насадителю.

Радуйся, врагов иноплеменных смиряяй.

Радуйся, скорбь нашу в радость претворяяй.

Радуйся, яко во успении своём нас не  
оставляеши.

Радуйся, яко о прощении грехов наших  
Господа Бога умоляеши.

Радуйся, яко тобою милосердие Божие  
призываем.

Радуйся, яко тобою спасение вечное  
получити уповаем.

Радуйся, преподобне отче Илие, святыи  
воине и великий заступниче Российския земли.

### **Кондак 13**

О предивный угодниче Христов, преподобне  
отче Илие, заступниче и воине земли

Российския, прими от нас, недостойных, сие малое моление, с любовью тебе приносимое, и умоли Всеблагаго Господа силу свыше православному воинству подати, сохрани град твой, обитель твою и вся люди страны нашея от всякаго зла. Благоприятным твоим ходатайством испроси нам у Христа Бога прощения прегрешений наших, да с тобою и всеми святыми в Царствии Небеснем сподобимся пети Спасителю нашему: Аллилуиа.

Этот кондак читается трижды, затем икос 1 -й: «Ангелов и человек...» и кондак 1-й: «Избранный воеводо...»

